

» Nantya kada nró sa nrúku to'on nró

Natáka ñayii xi ní INE, nreta ñuù xi nreta nrá'a ñuù du'vani iyo vaxi ntsáa kidáa, va'ani ka'an nreta to'on nantya sani iní ñayii, to'on va'a ntyóxi sa ñatéen xi to'on yodo sa nanré'e xi ñuù.

Du'vani, nreta ñayii ki'in natáka va'ni nanrúku ñayii nakuiin nuù xí ñuù sanà kada ntsá'a nantya kua'an nreta to'on va'a nanì ta'an ntsáa na ya'a kukatú to'on nakódo tutu tastuni.

» Ama iyo sa nrúku to'on nró

Sa natáka ñayii kukú nreta kii uvi xi kii oko èèn yóo usa kuiyi o'on tumi oko uvi. Sa nanrúku tutu yodo kii xi mi natáka ñayii kuyii <https://ine.mx/actores-politicos/candidaturas-indigenas-consulta/>

» Nakuù sa ntsátu naní'i sa nrúku to'on

Natéen nreta sa ka'an nreda ñayii, nreda ñuù xi nreda nra'a ñuù ntyóxi, na kukú to'on nantya sani iní xi to'on ntyóxi nanà téen ni INE nrada va'a xí tutu nakódo to'on tastuni na tyintsée du'va nakoò kuaña'an xi ñayii nrá'ku ki'in tyiño sa kada nráa xi ñayii ñuù du'vani iyo vaxi ntsáa kidáa, nráa nanà kuiin tyintsée ña'an xi ñayii ñuù nakuiin nuù xí ña nakuiin kukú tade'e.

Nrúku to'on di'na, meè ní xi datsáku ñá'an xi nreta ñayii, nreta ñuù xi nreta nrá'a ñuù du'vani iyo vaxi ntsáa kidáa, sa sa'axi sa nakíni ní meè na nrúu nráa nanà téen sa nanrúku tyiño ñuù kuná'nu ñuù ko'yo kuaña'an nreta da'a ñuù

Ku INE yu nanre'é koòn tsakuxí sa ka'an nró xi nadà taka ñá'an.

¡ki'in nró!

Nreta ni tastuni ñuù ta'an Ve'e ñuù ko'yo natyído tuní xi nakána sanà nrúku ñayii kí'in tyiño ñuù (INE) dokáda sa nrúku to'on xi ñayii, nreta ñuù xi nreta nrá'a ñuù du'vani iyo vaxi ntsáa kidáa, sana kuañá'an nreta to'on sa sa'axi nreta tutu natéen nreta partido xi nreta ni nakoò ta'an iyo sa ya'a ntyisa sa nakíni ní meè nrúu nráa xi da'a ñuù ntyóxi kí'in tyiño ñuù kuná'nu ñuù ko'yo, kuañu ntsáa sa kada nráa xi da'a ñuù du'vani iyo vaxi ntsáa kidáa, du'va koò nanrúku ñayii kí'in tyiño ñuù ko'yo kuiya o'on tumi oko uni xi kuiya o'on tumi oko komi.

» Nákuù sa kada nráa

Nreda sa ñuù ta'an nanré'e sa kintsée ñá'an nanà dáma sa tuva'a kida vaxi tú èèn nuù xido ta'an nreta ñayii sanà kúu natéen nreta to'on nráa nakuiin nuù ñayii, du'va kida xi nreta ñayii ñuù du'va iyo vaxi ntsáa kidáa.

» Nantya kida vaxi

Kuiya o'on tumi so'on uni, ve'e INE davita kúu sakitúu sa iyo èèn sa kada nráa sa sa'axi nreta ñayii kuù ñuù du'vani iyo vaxi ntsáa kidáa na kúu natéen sanà nrúku tyiño ñuù nrada va'a tutu kuná'nu ñuù ko'yo, kada ntsée xi nreta partido na daki'in ntyísa ñayii kuù ñuù du'vani iyo vaxi ntsáa kidáa, joòn ní, nri uxi uni distrito electoral; kuiya o'on tumi oko èèn, nrúu veváka oko èèn distrito xi eén ñayii natyido tuní sa kí'in tyiño takua'a nráku kida da'a ñuù.

» Nakuù sa nakíni ní meè sa nráa kúu

Artículo uvi tutu ntsé'e kuná'nu ñuù ko'yo katyi sa ñu'un diki ñayii kuù da'a ñuù du'vani iyo vaxi ntsáa kidáa –nakíni ní meè– kuù sa kunuù natéen sa kaki tú nrúkúu sa dokáda xi nreta to'on yodo tuní sa sa'axi nreta ñuù du'vani iyo vaxi ntsáa kidáa.

Dodi, sa sá'axi sa natyído tuní xi nakána ñayii kí'in tyiño ñuù Ve'e ntsé'e kuná'nu ntsá'a nreta kuatyí nretúu sa nanrúku ñayii kí'in tyiño ñuù kuná'nu ñuù ko'yo, sakitúu sa nanà téen nreta partido, na daya'a nráa sa iyo ntyísa sa xini ta'an nreta ñayii ntyóxi kí'in tyiño ñuù xi nrá'a ñuù natyído tuní meè; sa'a kuù sa nani nakíni ní meè nráa kuù da'a ñuù.

» Nakuù sa nrúku to'on dí'na, meè ní xi datsáku ñá'an

Nreta ñayii, nreta ñuù xi nreta nrá'a ñuù du'vani iyo vaxi ntsáa kidáa, iyo to'on na'ma ñá'an sa va'ani ka'an ni òòn sa nanà téen nreta to'on va'a kuetyiño sa sa'axi nreta sa tuva'a kida vaxi. Sa du'va katyi, tade'e iyo sa datsáku ñá'an nráa xi sa kuniní nreta to'on sani iní xi nreta to'on ka'an ntyóxi sa nanà téen na nruva'a sa tuva'a kida vaxi, dí'naka sa dokáda.

» Nakuù sa nrúku to'on nró

Ta kida, nreta sa nanré'e xi nreta sa va'a iyo natéen sa nantsá'a xi sa daya'a sa nakíni ní meè sa nráa kúu da'a ñuù, dii kúu, sa kida ná'nu sa daya'a ñá'an xi ñayii ntyóxi nakuiin tyiño ñuù du'vani iyo vaxi ntsáa kidáa, nráa na kini tá'an xi ñuù nakoò ta'an xi ntyóxi nakuiin nuù xí.

» Nrúu kuù sa nrúku to'on nró xí

Nreta ñayii ñuù du'vani iyo vaxi ntsáa kidáa ñu'u ntsá'yu Ñuù Ko'yo, èèn èèn ní ñayii nrúku to'on xi, kintsée ñá'an nreta tade'e du'vani iyo vaxi ña tade'e nreta da'a ñuù, xi tade'e nreta ve'e nakuiin nuù ñuù.